

Date – 30/05/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- 1. Sawrkar laipua Power and Housing & Urban Affairs changtu Union Minister Manohar Lal a'n Mizoram chu Kawlphetha-ah a intodelh theih nan theihtawp an chhuah dawn tih a sawi.**
- 2. Chief Minister Pu Lalduhoma leh Union Minister of Power, Housing & Urban Affairs Pu Manohar Lal nimina inkawm chuan kawlphetha intodelh kawnga Mizoram hmasawna tur leh Thenzawl Peace City chungchang an sawi dun.**
- 3. Union Agriculture Minister Shivraj Singh Chouhan chuan loneituten an mamawh thlai chi an dawn theih nan thlaichi quintal nuai 1 leh sing sarh sang li chhekkhawlna siam a ni a ti**
- 4. Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn.**

<><><>

UNION MINISTER PRESS MEET

Sawrkar laipua Power and Housing & Urban Affairs changtu Union Minister Manohar Lal a'n Mizoram chu Kawlphetha-ah a intodelh theih nan theihtawp an chhuah dawn tih a sawi.

Zan khat cham tura lo zin Union Power and Housing & Urban Affairs Minister hian nimin khan Aizawl lo thlengin Secretariat Conference Hall ah Mizorama sawrkar mi pawimawhte nen State Review Meeting of Power and Housing & Urban Affairs an nei a, hemi zawh hian thuthar thehdarhtute kawmin Pu Manohar Lal chuan Mizoramah Kawlphetha chhit man a to zel avang leh thawhchhuah a tlem avangin kawlphetha intodelh kawngah tan lak a pawimawh thu a sawi a, Mizoramah kawlphetha intodelh nan project siam thuai tum anih thu sawiin Nizung atanga kawlphetha lakna kawngah mi rethei ten hamthatna an dawn theih nan PM Surya Ghar : Muft Bijli Yojana hnuaih hmalak ani dawn tih a sawi.

Union Minister chuan Swachh Bharat Mission chu hlawhtling takin tum 2 kalpui alo ni tawh a ti a, Swachh Bharat Mission 1 leh Swachh Bharat Mission 2 chu ramchhungah a hlawhtling tih sawiin Mizoramah pawh a hlawhtlinna an hmu a ti a, thingtlang hmun kilkhawr hrang hrangte ODF Plus ah puan chhoh mek zel ani tih sawiin faina kawngah sawrkar hmalakna chuan rah tha a chhuah thu a sawi a ni.

<><><>

CHIEF MINISTER & UNION MINISTER

Zan khat riaka Mizoram lo zin Union Minister of Power, Housing & Urban Affairs Pu Manohar Lal chuan nimin khan Chief Minister Pu Lalduhoma chu a chenna inah a hmu a, kawlpheha intodelh kawnga Mizoram hmasawna tur leh Thenzawl Peace City chungchang an sawi dun.

Chief Minister hian, New Delhi-a Pu Manohar Lal Khattar-in a lo sawipui tawh thin Darzo Lui Pump Storage Project chungchang, Power Evacuation Line Mizoramin a mamawh belh dan leh RDSS hnuaia hmalak mek bakah Rooftop Solar installation lama hmalakna te a sawipui a. A enkawl Ministry hnuaia 10% GBS hmanga Mizorama hmalakna kalpui turin a lo ngen bawk.

Chief Minister hian, MoHUA atanga Thenzawl Peace City dinna tur bultanna Master Plan thawhna tur a pek avangin lawmthu a hrilh a. Tluang taka hmalakna a kal thu a lo hrilh a. Union Minister hian Chief Minister thil thlente hi a theih anga a lo bawhzui tur thu a sawi a ni.

<><><>

INTERNATIONAL AIDS CANDLELIGHT

Health Minister Pi Lalrinpui'n HIV/AIDS avanga harsatna tawh mekte lungngaihna leh manganna hriatsak an ni a ti a, HIV laka invenna leh inenkawlna lamah nasa zawka inzirtirna neih a tul thu a sawi.

HIV/AIDS avanga thite hriatrengna, International AIDS Candlelight Memorial Service chu nimin khan Aizawl ah hman a ni a, hun hmanpuitu Health Minister chuan Positive Women Network Of Mizoram-te HIV/AIDS vanga harsatna tawh tanpui tura an awm chu a lawmawm a tih thu sawiin, HIV/AIDS vanga boral tawh te chu hriatreng an nih thu a sawi.

Inkhawmah hian HIV/ AIDS vanga thite sunna leh hriatreng nan Bati an chhi a, an tawngtai rual bawk.

<><><>

CM

Chief Minister Pu Lalduhoma'n nimin khan Mizoram tlawha lo zin UFC Flyweight Champion lai Joshua Van chu thingpui a inpui a, a hlawhtlinna ropui chuan Mizo thalaite chona nasa tak pe se a duh thu a sawi.

Joshua Van chuan Mizo mipuiten UFC Champion nei ah inngai se a duh thu a sawi a, Mizoram chu a ram anga a ngaih, unaute anga a en anih thu sawiin hun chep tak kara inhmuhna hun a buatsaihsak avangin Chief Minister hnenah hian lawmthu a sawi a ni.

Zonet TV leh Mizoram Mixed Martial Arts Association tangdun buatsaih MISMA Fight Night chhim turin UFC Flyweight Champion, Joshua Van hian nimin khan Mizoram a lo thleng a, zaninah Zonet TV leh Mizoram Mixed Martial Arts Association tangdunin Mualpuia R. Dengthuama Hall-a MISMA Fight Night an buatsaih a hmanpui dawn a ni.

<><><>

PHE MINISTER

PHE minister Prof. Lalnilawma'n Aizawl khawpui tui tlan ber Tlawng lui tui pump-na pakhat, Greater Aizawl Water Supply Scheme Phase-I tui pump khawl awmna chu tui lianin a chim phak loh tura a awmna hmun tihsan hna thawh a nih dawn avangin duh anga tam tui pump theih a nih dawn loh a ti a; Aizawl mipuite chu tui ren tur leh fur ruahtui khawl turin a ngen.

Vawiin atang hian Phase-I khawl hi metre 5 vela sangin chawisan hna thawh tan a ni dawn a, thla 6 atanga thla 9 inkar vel chhunga thawh zawh theih beisei a ni, a ti.

Tui pump khawl awmna hmun chawisan hna thawh chhung hian Phase-II leh Phase-III hmang chauhin tui a pump theih rih dawn tih sawiin Prof. Lalnilawma chuan, tui sem dan chu a pangngaiin ni 10 danah zel kalpui tum ala ni a, amaherawh chu mipuiin tui an dawn zat erawh a tlem deuh dawn, a ti a; mipuite hriatthiamna ngenin, tui ren tur leh fur ruahtui khawl turin a ngen nghal a ni.

<><><>

KAWNPUI POLICE

Kawnpui Police-in tunhnai khan Rail kawng bungrua (OHE Cable) rutu-a puh mi 9 an man.

Kumin February leh March thla inkar vel khan Rel kawng hmun hrang hranga OHE Cable chu ruk a ni a, Railway hotuten Kawnpui Police Station-ah FIR an theh lut a. Hei hi Mizoram Police and the Railway Protection Force (RPF) tangduin ngawrh takin an chhui zui a, March ni 21 khan Mualkhang Rel Station-a thil ruk tum mi 2 chu nangchingin an man a, Kawnpui Police kutah an hlan zui a ni. Heng an mi man pahnihte inpuanna leh chhui zuina atangin Kawnpui Police chuan Kulikawn leh Bawngkawn Police Station-a thawktute puihnain mi 7 an man belh a ni.

<><><>

MIZO TAXI APP

Mizorama Passenger phur chi lirthei-a chuang thin te'n Sorkar approved rate diktak an chawi theihna atana duan Mizotaxi mobile app chu peih fel a ni a. July ni 1 atanga hman tan tur a ni.

Mizoram leh Digiride Technology Pvt. Ltd., NIT(Mizoram) tangkawpin an buatsaih Mizoramtaxi mobile app chungchang hi nimin khan Secretary State Transport Authority Mizoram chuan thuchhuah siamin Sorkar duhdan angin Aizawl khawpui chhungah bul tan phawt tur a ni dawn an ti a, a tahtawlin District dangah pawh kalpui chhoh zel tum a ni.

Aizawl khawpui chhungah hian 'Mizotaxi' app hi July ni 1 atangaga hman tan tur a ni a, Aizawl khawpui chhunga service lai 4-wheeler taxi te, 2-wheeler taxi leh Autorickshaw zawng zawng te chu June 2026 chhungin Mizotaxi Office, DTO(L.A) Office hnuai, Transport Complex, Chaldangah registration tifel vek tura tih an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION AGRI

Union Agriculture Minister Shivraj Singh Chouhan chuan loneituten an mamawh thlai chi an dawn theih nan thlaichi quintal nuai 1 leh sing sarh sang li chhekkhawlna siam a ni a ti. Nimina National Conference on Agriculture for Kharif Campaign 2026, New Delhi-a neihah chanchinbumite kawmin he thu hi a sawi a. Pu Chouhan-a chuan rampumah loneitu nuai 9 sing 7 leh sang 6 te tan ID siam a ni tawh a ti a. Tunah chuan loneituten sawrkar scheme siam hrang hrang dawng turin lehkha pawimawh dang an mamawh tawh dawn lo a ti a. Pu Chouhan-a chuan leitha sem kawngah langtlang taka thil tih a tul thu sawiin dankalha tawlhruk ven leh loneitu diktakten leitha an mamawh an hmuh chu a pawimawh thu a sawi a ni.

<><><>

OIL AND LPG

Sawrkar laipui chuan rmachhungah Petrol,diesel leh LPG te mamawh khawp a awm tih sawiin ramchhunga tuialhthei thlitfimnaten dan pangngaiin hna an thawk a ti. Nimina Inter-Ministerial media briefing ah Union Ministry of Petroleum and Natural Gas Joint Secretary Sujata Sharma chuan he thu hi sawiin LPG siamchhuah pawh a tam lai ber niin nikhatah metric tonne sing 9 leh sang 2 siam anih thu a sawi a. LPG semchhuahna kawngah khaih lak a awm lo niin a sawi baw k a ni.

<><><>

PM MANN KI BAAT

Prime Minister Narendra Modi chuan Pathianni May ni 31 chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 134-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni baw k ang.

<><><>